

Date – 31/05/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl Meteorological Centre thlirlawk danin vawiin hian Mizoram district tinah thli, ruah, leh tek a thawk chhunzawm dawn.
2. Nizan khan Lawngtlai Bazar veng leh Chandmary veng inkara National Highway 54 kawngkama awm inrellai 2 telin in 6 a chim a, mi engzat chiah nge a chhilh hriat a ni rihlo.
3. Ruahsur nasa avangin hmarchhak state hrang hrangah mipui nunphung a khaihlak nasa hle.
4. Prime Minister Narendra Modia chuan Operation Sindoor chuan India tualchhung siam ralthuam that zia leh ramchhunga thilsiam chhuahte theihna san zia a pholang tih a sawi

<><><>

WEATHER

Aizawl Meteorological Centre thlirlawk danin vawiin hian Mizoram district tinah thli, ruah, leh tek a thawk chhunzawm dawn.

Akashvani zawhna chhangin Aizawl Meteorological Centre Director Pu Sudheer Kumar Dwivedi chuan mipuite chu fimkhur tura chahin ina awm tam tur leh pawn chhuak tam lo turin a chah a, leimin theihna hmun te chu pumpelh hram turin a chah a, ruah tam tak sur avang hian district hrang hrangah lei a min thei a ti a, khawchhia avang hian khua a hmuh fiah theih a rinawm loh avangin lirthei khalhtute chu Traffic thuneitute ngaichang a, an thuchhuah te zawm tha turin a chah a ni.

Nimin atangin leh Nizan zankhuah ruahpui vanawn sur chuan khawsak phung nasa takin a ti khaihlak a, chhiatna hrang hrang a thlen bawk.

Nizan dar 10:30 bawr vel khan Lawngtlai Bazar veng leh Chandmary veng inkara National Highway 54 kawngkama awm ah inrellai 2 telin in 6 a chim a, chhanchhuah hna a theih ang angin thawh nghal a ni a, mi engzat chiah nge a chhilh hriat a ni rihlo.

VC

Champhai District ah nileng zankhuain ruah a sur a, nimin piah lam aiin a sur ngawrh a, Nizan dar 10:00 vel atangin Aizawl Zuangtui atanga Champhai District in Power a dawnna 132 kv line chu Saitual lamah a chhiat vangin tukin zing thlengin power supply Champhai District in a dawng thei lo.

Hetihlai hian East Tuipui biala Sazep khuaah Chenna in pakhat leh Car pakhat leimin in a hnawl a.Mihring hliam an awm lo hlah va, bungbel leh mutbu erawh a chhilh ni a thudawn a ni.

Hetihlai hian, Dist dang atangin Leimin leh thil dang chhia, harsatna thleng report a awm rih lo a ni.

<><><>

AMC DRAWING OF LOTS

Nakuma Aizawl Municipal Corporation (AMC) inthlanpui neih tur atana inbuatsaihna kal mekah nimin khan hmeichhiate tana seat hauhsah 6 te sinna tur ward zawnna thumvawr a ni a,

DC Conference Hall-ah Mizoram State Election Commissioner Dr.H.Lalthangliana kaihhruaina hnuaiah he hun hi hman a ni a, AMC hnuaia Ward 19 zinga hmeichhia te dinna tur chu

Ward No.—2 (Bawngkawn, Chaltlang huamchhung te)

Ward No.—4 (Ramhlun South & Ramthar)

Ward No.-- 5(Chanmari, Electric Veng huamchhung te)

Ward No.-- 11(Luangmual, Chawlhmun huamchhungte)

Ward No.—12 (Tuikual N & S, Dinthar)

Leh

Ward No—17 (Republic leh Venghlui huamchhung te a ni)

Thumvawr naah hian Recognized leh Non-Recognized Political Party aiawh te, MJA aiawh te, Mizoram Upa Pawl (MUP) aiawh te leh Mizoram People Forum aiawh te an tel a. Thumvawr hi Mizoram Upa Pawl (MUP), Mizoram People Forum leh Mizoram Journalists’ Association aiawh ten an pawt a ni.

<><><>

MIZO DIVORCE & INHERITANCE

Mizo Inneih, Inthen leh Rokhawmna Dan (The Mizo Marriage, Divorce and Inheritance of Property Act, 2014) ennawntu Review Committee chu an Chairman Pu Zahmingthanga Ralte, Additional Secretary, Law and Judicial Department hovin nimin khan Secretariat Conference Hall, MINECO-ah an thukhawm a.

Chairman Pu Zahmingthanga Ralte chuan he Dan hnuaiah hian Mizo hmeichhiate’n ro an khawm theihna tur leh nupa inthenna a thlen chang a hmeichhiate chanvo tur te tarlan a ni a ti a, hei hi Mizo hnam tan thil chhinchhiah tlak tak a nih thu a sawi.

Tun hnaiah a mipa zawk Mizo ni hauh lo te leh Mizo hmeichhiate he Dan hnuaia inneihtir engemawzat an awm tih sawrkar chhinchhiahna atangin a lan thu a sawi a, hetiang Inneihna hi Dan mit atanga inneihna tling lo a ni tih sawiin, hemi lakah hian Inneihtirtu (License Holders) zawng zawngte fimkhur leh zual turin a chah a. He Dan hnuaia Inneihna Licence kawl zawng zawngte leh Kohhran hrang hrang ami te chu he Mizo Inneih, Inthen leh Rokhawmna Dan, 2014 hi chiang taka chhiar thin turin a chah bawk a ni.

Review Committee hian rawtna engemawzat a siam a, a tlangpuuin Dan dinglaia thil fel tawk lo siamthatna tur a ni hlawm a. A Dan hming hi a sei deuh avang leh hetiang lam Dan dangte hming enkual a nih hnuah he Dan hming thar atan ‘The Mizo Marriage and Inheritance of Property Act’ (Mizo Inneih leh Rokhawmna Dan) tih mai ni se tiin rawtna siam a ni a. Heng rawtna hrang hrang te hi Sawrkarin a pawm chuan Assembly Session-ah Dan dinglai siam tha tur a Bill put luh a ni ang.

Meeting hi hi Review Committee thutkhawm vawi thumna niin, Central YMA, MHIP Headquarters, MUP Headquarters aiawhte leh Mizoram BAR Association aiawhte bakah helama mi thiam bikte an tel a ni.

<><><>

COVID NEW CASE

Mizoramah COVID-19 hri kai thar pahnih hmuhchhuah a ni a, National Health Mission hnuaia IDSP chuan hemi avang hian mipuite chia lo turin a chah.

Mizoram Health & Family Department hnuaia Integrated Disease Surveillance Programme (IDSP)-in vawiina COVID-19 chungchanga mipuite hriattirna a tihchhuahah tûn dinhmunah Mizoramah Covid-19 hri kâi thar mi pahnih hmuhchhuah an ni a, Zoram Medical College & Hospital, Falkâwnah enkawl mêk an ni a, ngaihtuahawm an ni lo a ni.

Tûn hnaia ramchhung hmun thenkhata Covid-19 Variant JN.1, XFG leh LF.7.9 positive case hmuhchhuah a nih leh chungchângah mipuite chi-ai lo türin an ngen a, tûnlaiah Covid-19 hri kaite chu na lutuk an awm loh avângin, in lamah enkawl an ni tângpui tih sawiin, mipuite chu Covid-19 laka an him theih nan Sahbon emaw Handwash emaw hmangin kut fai taka sil thin tur leh, Hand Sanitizer hmang thin turin a chah a, hritlâng âwm nâ neite chu hmai tuam thin turin a chah bawk.

Cancer, Zunthlum, Thisen Sâng, Asthma, HIV leh Natna benvawn dang veite, Nu Naupai leh Kum upa te fimkhur leh zual tur leh a theih chuan puipunnaah kal loh hram tur a ni a. Loh theih lova puipunna-a kal tûr te chu uluk taka hmaituamna, mask vuah turin a chah a, Covid Symptom neite chu puipunna hmunah kal lo tur leh , midangte an kai darh lohna tûra mahni invêng fimkhur tûrin a chah bawk a ni.

Mizoramin Covid-19 positive a neih hnahnun ber chu nikum October thla kha a ni a, kum kalta 2024 chhûnga Mizoramin Covid-19 kai a neih zawng zawng chu mi 73 an ni a, nunna chôn an awm lo thung.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



RAIN HAVOC IN NE

Ruahsur nasa avangin hmarchhak state hrang hrangah mipui nunphung a khaihlak nasa hle a. Arunachal Pradesh ah chuan India Meteorological Department (IMD) chuan district panga ah fimkhur tura hriattirna red alert a puang a. Hmun thenkhatah chuan tuilian avanga harsatna a thlen thu dawn a ni a. Upper Subansiri district ah chuan Sigin lui a lian a, chenna in 100 chaung tuiin a chim tawh a ni.

Manipur ah pawh ruahsur nasa vangin mipui nunphung a khaihlak a. District pahnihah red alert puan a ni a. Hmun tam takah leimin avangin inbiakpawhna a chhia a, lui tui chim chin san zel avangin hmun thenkhatah tuilian thei dinhmunah an ding mek a ni.

Assam-ah chuan ruahsur nasa avangin Guwahati khawpuiah tui a lian a. Brahmaputra leh lui dangte chimchin a sang zel a ni. Dhubri, South Salmara-Mankachar, Goalpara, lehDima Hasao district ah te tuilian, leimin leh tui tling nasa vangin harsatna an tawh a ni.



PM

Prime Minister Narendra Modia chuan Operation Sindoor chuan India tualchhung siam ralthuam that zia leh ramchhunga thilsiam chhuahte theihna san zia a pholang tih a sawi. Nimina Uttar Pradesh-a Kanpur-a cheng vaibelchhe 47,600 chuang man hmasawinna project chi 15 a hawinnaah he thu hi sawiin Pu Modia chuan he thu hi a sawi a. Ralthuam siamchhuah lamah ram a intodelh theih nan Uttar Pradesh chuan dinhmun pawimawh tak a luah tih a sawi bawh a ni.

PM Modia hian Chunniganj leh Nayaganj inkara tlan tur Kanpur Metro a vailiam bawh a ni.

Prime Minister Narendra Modia hian nimin vek khan hmasawinna project hrang hrang cheng vaibelchhe 48000 hu Bihar-ah a hawng bawh a. Thusawiin Pu Modia chuan double-engine sawrkar chuan Bihar tan kawng tinrenga hmasawn turin a thawh a ti a. Vawiina hawn tak project te pawh hi he hmasawinna lam hawi vek anih thu a sawi a ni.

PM Modia chuan India-in firfiakte a dona kawngah tha a thlah thei lo tih a sawi a. Ram hmelma firfiakte emaw naxal helho an ni emaw na taka dolet zel an ni ang tih a sawi bawh a ni.

<><><>

DELEGATES

Sawrkar laipui tirh BJP MP Ravi Shankar Prasad-a kaihhruai Parliamentary delegates te chuan Denmark-ah hun hmang mekin nimin khan Danish Parliament's Foreign Policy Committee chairperson Christian Friis Bach, leh Danish MP Trine Pertou Mach te an kawm a. Pu Prasad-a chuan firfiakte a dona kawngah India chu Denmarkin a thlawp tih a sawi.

<><><>